

陶文毅公全集

陶文毅公全集卷四十六目錄

文集 墓表 墓碣 傳

太常寺少卿卿公墓表

劉屏山翁墓表

劉槐軒先生墓表

黎拙翁墓表

王太翁墓表

誥贈奉直大夫安徽懷遠縣知縣加三級孫君墓表

處士黃公殿元墓表

太學生夏君墓表

瞿敬軒先生墓表

賀處士墓表

從兄蘭江先生墓表

周曉齋夫婦墓表

唐母甯夫人墓表

節孝黃母陶太君墓表

袁太君墓表

處士夏明旦先生墓碣

上舍王虎文先生墓碣

劉水亭墓碣

曾生墓碣

側室張氏墓碣

褚先生傳

十四歲作

楊先生傳

文集 墓表 墓碣 傳

太常寺少卿卿公墓表

公諱祖培字錫祚號滋圃姓卿氏廣西灌陽人系
出戰國虞卿之後明洪武中有曰閩山者自楚從
軍粵西著籍灌陽代有隱德曾祖慕唐始爲邑增
廣生祖化鵬附學生考彬歲貢生三世知名而考
尤以純德稱少孤事母至孝居喪廬墓三年哭踊
之地成垞經學深邃著有周易貫義洪範參解律
呂參解楚辭會真等書道光元年春

敕祀鄉賢兄弟三人長祖一舉乾隆戊申鄉試第一官

廣東海豐知縣以廉善稱沒於官海豐之民不遠數千里送其柩歸葬次祖廕廩膳生公其季也幼而穎異下筆驚其長老年十六補諸生充嘉慶辛酉拔貢以是年舉於鄉明年壬戌會試成進士改翰林院庶吉士連丁外內艱辛未散館授編修充武英殿纂修官旋兼

國史館纂修官乙亥引

見

記名以御史用丙子補湖廣道監察御史丁丑充會試同

考官奉

命稽察南新倉戊寅擢工科給事中充順天鄉試內監試

官巡視西城已卯九月轉兵科掌印給事中

今上卽位之元年辛巳十一月

特擢內閣侍讀學士詎爲給事時甫半歲遽班九列壬

午四月擢太常寺少卿九月奉

硃批幫辦批本甫七日奉

御批稽察右翼覺羅學又

命磨勘各省鄉試卷

主眷方殷駿駿大用而公竟以是年十一月初九日卯

時疾卒年四十有七公起秀才爲翰林以聖賢自

律氣度閭然粥粥若無能而留心當世之務及官御史侃侃不阿甫拜

命卽劾奏吏部郎溫某恃勢要橫行縱僕毆職官於途有旨逮問都下肅然南新倉夙弊深胥吏每以氣頭廠底攬朽米其中脅領米者索放費斛面因之爲贏縮公奏請釐剔吏無所容其姦又念近世學者僥倖弋獲束宋儒之書不觀恐其陷溺深而生心害政也因上疏請明教法以端士習而儲人才其略曰國家以經藝取士欲其講求經書大義以體驗於身心則發之爲文可以驗其心之所得施之於事卽

以行其心之所安也今士之亟於進取者但知掇
科名習揣摩形似之言點綴工巧之語按之實義
鮮能發明清切司衡者偶一錄取無知者轉相倣
效其弊將置書理於不問而本心之理日以錮蔽
應物處事任其氣質之偏習俗之染而不能得讀
書明理之益則有才而適以滋弊若使聰明特出
之才皆範圍於聖賢經術之中研求義理之精微
而本心之理益明化其氣質之偏克其已私之累
循天理之自然不爲人欲所陷溺庶才足以致用
不負乎經義取士之意矣伏讀

御纂朱子全書

御製序又冠諸篇首頒發海內誠以宋儒闡發前人之祕而朱子集其成觀其所論爲學之方並推闡持敬主一無適之說委曲詳盡令人曉然於天理之必當循性分之不容虧而向來學臣按試未有以其書直切指示鄉曲之士終身或不得一見乞

敕下各省學政將此書化導諸生舉其要義往復申論或時至書院與院長共相懋勉或督令各學教官廣爲訓迪不必明設科條以飾觀聽務使大公之理衆著於人心饜飫優游有所自得由是上溯經

書之闢輿必能代聖賢立言發揮精義在學臣取
士平日旣以身範自端嚴義利之辨而與多士講
之有素及臨試又能因其文以取其才趨向旣正
隨所造就必不至於誤用聰明而可以爲

國家培養元氣一鄉一邑之中得一二讀書明理之
士以薰德而善良則淳樸成風宇宙之內莫非太
和之所翔洽矣疏入得

旨通飭遵行德水盧公讀之歎曰久不聞此論可謂朝陽
鳴鳳也吾不識卿給諫有以知其爲今之古人矣
其他若請禁賭博以清盜源請嚴考試教習以杜

冒濫請

聖駕所經除道毋虛設多員以省擾累皆見諸施行無
摭拾陳言以應故事者天性純篤承鄉賢公義方
之訓一言一行必自檢攝居親喪前後廬墓六年
在翰林歲用仰給祿米數十斛出惟一僕從入則
夫人執炊在御史班聯承直費寢多處之如在翰
林時其清苦刻厲有中人所不能堪安之泰然無
幾微困竭狀和平樂易脩於身而見於行不言而
人自化忘其爲道德之士也尤嚴於取予之際嘗
寢疾同年生三四人往省見其裘敝幾見鞠恐其

爲寒氣所中醲製一新者遺之再三卻許以他日
還而後受張公鵬展者公鄉之賢人也自山東學
政回京知公貧餽百金不受強而暫留後卒還之
其介也如此祖及考贈如公官祖妣妣王皆贈淑
人夫人莫氏先卒時未有子以長兄子先佑爲之
後繼娶黃氏妾王氏癸未三月舉遺腹子先奕甲
申三月公仲兄祖廕葬公於西山坪逾六年己丑
七月祖廕率先佑來乞表其墓謝知公最深謹摘
敘生平揭之於碑石以示後之有志於世道人心
者

劉屏山翁墓表

往余隨先子讀書益陽之十里與劉子冠南爲
筆硯交得以禮見其尊人屏山翁肫肫盛德人也
其六十之辰先子曾手書長聯以贈後二年翁
卒余亦往來京國數載未獲展雞酒之儀而冠南
以書寓余丐隧道之辭不敢以不文謝蓋翁之所
以積於躬者厚矣其居平粥粥若無能而里之人
顧相與稱之以爲善人始翁少時好讀書試弗售
乃棄去事生人業貲產日饒然能澤其鄉里遇歲
歉告糴不俟價持錢來者贏升斗資之遠者給食

飲有餘則周人之急如田文之焚券者屢矣以父
遺命戒爭訟遇事退讓人不忍欺見爭競者解囊
息之終其身未一訟也至於繕家乘葺宗祠置祭
田咸以實心力行之蓋敦宗之誼尤篤云翁之諱
曰啟義其字曰相輝其生以乾隆某年月日其卒
以嘉慶某年月日配文氏先翁卒葬在公之左子
四人長某早沒次冠南邑庠生次某某太學生孫
六孫女三婚嫁皆世族翁之葬地曰獅山葬後八
年而余爲表墓

劉槐軒先生墓表

余與劉君英泰同研席得見其大父槐軒先生家訓語嚴情摯令人肅然動高曾之思今歲英泰乞表其隧道余既悉先生之貽謀有以知其爲端人也遂弗辭先生諱承傳字某槐軒其號先世南昌徙也曰伯川者仕元爲學士出守常德隸籍焉又二世遷於益陽五世至忠節公憲當明武宗時以抗直忤劉瑾死於獄爲楚南忠孝之家先生之先孝廉公實學士之元孫而忠節公叔父也詩書奕奕代有聞人先生弱不好弄欲以功名自顯數奇

不遇遂退志山林以終篤於倫誼母病不解帶視
醫藥配某孺人有賢德夫耕於外妻織於內諸子
咸令就學曰黃頭厯齒高人動心吾不能以空乏
而令其廢業也英泰幼穎異愛望之尤甚日課所
業有進則喜見顏色病中猶以語其季遜迨令料
理之毋荒廢以故英泰益感奮爲名諸生將來詩
書之澤當有以報先生也先生生於康熙某年卒
於乾隆某年葬某山孺人後先生數年沒別有碑

誌

黎拙翁墓表

翁諱祚照字某姓黎氏拙翁其號同郡寧鄉人從
祀鄉賢曰啟淳者翁之祖也父某母某氏兄弟五
人齒居三少孤與其次兄各挈一弟成立家法素
謹出入必告於兄分財無猜雖疏從若同胞尤好
急人之急求之立應囊澀則出穀給之有喻某陳
某者臨沒泣語其子自言死久矣賴黎翁復活今
死無復憾但未知所報耳其澤物如此翁旣仗義
疏財家遂薄藉教授以資朝夕諄諄不倦賴以成
材者頗衆又嘗隨其姪宦游閩中及歸惟圖書數

軸而已最後其子遷吾邑之小淹迎翁居之數年
卒嘉慶某年月日也距其生乾隆某年享壽六十
有奇遂葬小淹翁子三人長曰大芳以諸生遊幕
粵西有名孫某給事

武英殿用議敘得官候選縣尉大芳之子也大芳嘗
與先君子同學於岳麓故余爲翁表墓云

王太翁墓表

進士王君萬泉之尊人曰漢錦諱崇煥同里百花臺人也性樸直事親盡誠敬父沒獨秉家政十餘年待羣從昆弟能辭隆而從窳偕其配廖孺人老而相莊門以內聞如也家世巾箱教子尤有法及見其成名人尤稱之余里先進多蹇塞阨於遇自余以壬戌會試中式萬泉繼之辛未丁丑謙山惺溪兩黃君相繼獲雋十六年間登進士四人館選爲庶常者三焉獨萬泉以親老乞近選寶慶府教授時堂上猶具慶也而三人者謙山已不逮養澍

與惺溪皆自幼失恃當禮闈報至時老父已爲之
喜極而悲而游子之白華不及咽九泉之清醖其
爲感痛有倍於恒常者然後知仲子三牲五鼎不
如負米之歎其感人甚深也然則萬泉之改官而
歸其所得較之三人已多而太翁之樂在天倫者
不尤可歎歟太翁生雍正某年月日卒嘉慶十九
年月日壽八十有奇子二長禮壘邑增生次育卽
萬泉乾隆乙卯舉人嘉慶己巳進士將以某日葬
某山系之辭曰

肫然者其真闇然者其神式於鄉而有傳經之人

型於家而有偕老之賓香爓戔戔兮資水之濱佳
城鬱鬱兮終古嶙峋

諸贈奉直大夫安徽懷遠縣知縣加三級孫君墓表

咸賑者常州之東鄉也土厚而水清有隱君子居焉曰虹如孫君其爲學主自求諸心心之所安畢力赴之而不惑年未二十卽以事親敬長尙義好施爲鄉里表率鄉之人思之至今昔孔融告高密縣爲鄭元特立一鄉以爲公者仁德之正號不必三事大夫也如君者可以觀古人之概矣君之先自金壇遷居逮君六世聞金壇修譜一再往襄之集本支建宗祠於常時君之子讓尙幼請於君曰宗祠宜建久矣顧大人力不足盍少緩獨成之乎

君曰是非爾所知也。讓未喻，請至。再君卒不聽。常
州運河自白家橋迤東至橫林三十里，賊堰界其
中，居民往來所必經。時值昏暮，或甚風雪，舟人不
時渡，以索錢。徒旅病之。君倡義造橋，所費甚鉅。屢
興輟，君持不罷。役前後凡四十餘年，橋乃成。嗟乎！
凡人之始，念孰不欲善，而流俗毀譽與夫陰陽術
數禍福之說，皆足以奪之。又益計之家室之贏絀，
謀之於婦人女子，而廢然中阻者，蓋十之六七矣。
如君之一往無所顧慮，人徒歎其性情之厚，而不
知其詣力深粹，有獨脩於隱微之地者也。余與讓

同舉嘉慶七年進士讓爲余言君盛德事甚具其
後八年而君捐館舍又十四年余奉

命巡撫安徽讓適以懷遠令被議復官方待次益得朝
夕繼見而君配楊宜人亦卒讓始以墓石之辭爲
請謹按狀君諱璟虹如其字卒以嘉慶十五年七
月八日年六十有八國子監生

誥贈奉直大夫安徽懷遠縣知縣加三級楊宜人同縣
人勤儉善持家里黨人無間言卒以道光四年閏
七月五日年八十有一君祖唐臣布衣父朝佑贈
贈如君階初君之葬馳贈君也六年而家毀於火

或以墓地不吉爲言君不聽已而讓成進士家亦
無他咎君以樂善故屢傾其家楊宜人不爲怨顧
以爲宜然其教讓能發明君爲學之指讓守之不
敢渝戚墅之人皆曰孫氏之門且益大矣讓以君
卒之明年葬君於觀音堂祖塋道光四年楊宜人
喪歸六年十一月初二日始合葬焉男子子三人
長卽讓次訥國子監生次誠女子子四人適士族
孫九人曾孫七人

處士黃公殿元墓表

公諱崇榜字殿元雲瞻公子也黃爲安化一都著
姓自處士以上皆種德力詩書羣從游郡縣庠者
甚多公六歲失怙鞠於母

旌表節孝陶太夫人太夫人柏舟早矢教養之甚有法
言動必有典則而尤以忠厚二字篤其世克勤克
慎未嘗以一子愛憐公幼習其教恂恂懇懇生平
無一謾語一詭步古貌古心望而知爲長者家不
甚豐而常推以澤物逮後漸消落亦不以此責望
於人也配夏孺人有同德生子三德商德尙肄業

天文生德喬國子監生德尙早故有子力鋹而德
喬亦生子力鐔德商撫從弟之子力錦目前蓋三
孫矣女一適同里陶樹處士生於乾隆辛巳七月
十五日卒於嘉慶戊辰五月二十九日其葬也樹
爲卜兆於黃沙溪之棗木崙山向以酉卯

太學生夏君墓表

君諱遠壽字希彭號古屏先世由豫徙居益陽代有聞人曾祖世承以明經爲辰陽訓導祖澤清妣唐氏以節孝被

旌君少失怙恃惟祖妣是倚長操家政棄舉子業援例入國學益陽縣學明倫堂初設於

大成殿後乾隆癸卯議改建東齋之前君祖母實任其費嘉慶己巳君又新之並重葺儀門與前後齋之廢缺者邑人皆頌節母之賢益以歎君之善於繼志述事焉君宅心忠厚見義必爲有貧不能自

存者將鬻妻以償宿逋君爲之經紀使其夫婦得
完有婚嫁不能舉者輒飲助以成其美每歲暮必
發困粟以振里之貧人往往假貸焚其券施棺掩
骼爲之不倦尤篤於本支之愛建宗祠置祭田歲
以四月之朔合五服之親飲於其別墅極歡且以
耕讀勤儉相勗勉焉好接詩書士時有解推以成
其進取之志晚年築室於居宅之西偏額曰且閒
然素習於勤實未嘗閒也以道光戊子卒年五十
有八鄰里族戚聞之咸悼蓋其感人者有素矣子
二長肇傳候選從九品次某業儒肇傳嘗受業於

余乞一言以表爲據狀書其大略如此

瞿敬軒先生墓表

先生諱衡字翼臨敬軒其號安化二都人也二都之族瞿爲盛彬彬多儒者先鄉賢公嘗教授其地與先生相往還甚數最後從姪棣賢娶先生之從孫女執經於先生之子舍以故知先生尤熟先生幼穎慧甫四歲卽通四子書年二十入邑庠爲學官弟子沈酣經史當事咸以遠大期之顧數奇屢躋棘闈遂絕意仕進以訓子孫爲務嗣君澤琴以優行餼廩於庠先生教也先生雖無意仕進而於世道人心多所維持生平無宿諾亦無宿怨善

怒一發不可遏已過卽不復記憶人亦無怨者生
於乾隆十年某月日沒於道光三年某月日享壽
七十有八配莫氏一子卽澤琴先生旣篤學而有
惇德所以光大其世者未艾因嗣君請輒爲之詮
次生平俾過者是式云

賀處士墓表

處士諱光鑑字盈科引泉其號益陽十二里人也
賀故益陽茂族世有詩書父家祈生三子處士其
季平生耿介無他腸惟疾惡甚里有穿窬行者痛
懲之不少假借匪黨積不堪羣害之傾其產乃徙
居圻市圻市濱資江閩閩填咽處士所與游多一
時賢豪長者咸重其爲人嘉慶戊辰二月余始識
之於友人席上始處士娶同邑羅氏生一子有上
候選從九品娶文氏繼高氏阮氏女二長適儒生
鄧興霖年二十六而寡以苦節被

旌次甫待年擇尤愼嘗言吾女有異徵憐之必嫁官人
不以與凡子至是遂以歸余人以爲上谷侯處士
之儔也余旋攜家口入京師而處士亦卽以其年
八月二十四日病卒於里門距生乾隆己卯正月
十九日年五十葬賀家灣大路坡子山午向與羅
氏同厝相距一塚

從兄蘭江先生墓表

從兄蘭江先生以道光元年春入蜀時余擢晉臬
已起行入都蘭江遂留川東爲江津令延主儿江
書院講席生徒從之者二百餘人一時稱盛明年
仍留主講而嫂氏王沒於里蘭江遠館不知也余
時已擢藩安徽聞耗乃馳書告之蘭江方臥病得
書告歸以四月初二日自巴縣解纜二十七日舟
至益陽之大栗港距家九十里而沒時年七十有
二蘭江諱澧字秀掄爲人開爽胸中豁然不留塵
芥遇事能斷不畏強禦指揮如意少時貧不能學

力於耕作其叔父添德乃爲集村童開館於益陽
三里之八牛塘添德亦買藥於其地旋歸里與

先君子及洞崖伯必麟同學於龍先生時萬又學
於李先生少逸兩先生皆宿儒從游者衆而一時
推重必首舉三陶云丁酉正月與先君子同入
縣學爲弟子員旋補增廣生遂以教授爲業辛亥
壬子館於長沙肄業嶽麓城南兩書院山長羅愼
齋陳每田兩先生極稱之丁卯主講沅江瓊湖書
院戊辰己巳主講益陽龍洲書院皆能以經術爲
教賴以成材者頗衆其後僅益陽鄧氏者數年老

始入蜀視余間關數千里不及一握手而沒其可
哀也已其可感也已生平好義舉族譜縣志皆手
任修纂力肩厥成與先君子處尤摯休戚若一
人先君子沒後每談及輒泣然淚下已卯之冬
余方之官川東乞假歸里周視先君子之墓不
勝哀慟而蘭江亦周覽上下揮淚不止其情愴然
有追往念昔之感惟余知之旁觀者不知其涕淚
之何以縱橫也悲夫先是蘭江臥病於几江書院
遇異人以病問示之詩云硯田生計感江湖過得
春光九十無試問長沙遷去客洞庭秋水膺尊鱸

時壬午閏三月初一日也蘭江書來猶縷言其事
未幾遂告歸而卒始知春光九十過此卽無異人
之言驗矣蘭江生於乾隆辛未十一月二十三日
葬在古壠塢余弟子晉之左山向以壬丙有子一
人桂賢邑庠生女子三人長適李某卽少逸先生
之長孫次適某三適李煒廣東陽春縣典史孫三
人尙幼

周曉齋夫婦墓表

曉齋姓周氏諱光炯生乾隆乙巳十月二十七日
安化縣學生文軒先生諱宗先之子余妹壻也妹
諱珊英生丙午三月十八日少於曉齋一歲先
慈見背時妹甫五齡卽適周氏爲幼婦又四年而
曉齋失怙爲孤兒母陶孺人獨力支門戶兩家者
皆儒素瘠苦相因倚故曉齋髫而往來余家事

先子如父余兄弟視之親若同胞不以毛裏異也
曉齋貌秀穎性質安雅早有成人風而妹聰敏勤
篤操井臼躬布荆雍如也周氏自上世多種德文

軒先生修族譜篤宗親和閭里文名重一時人謂
門閭之大將自此佳兒佳婦始矣無何曉齋忽膺
疾卒嘉慶丙寅九月二十九日也妹時年二十一
奉孀姑以居形影相弔又三年己巳九月十九日
妹亦病沒嗚呼世有孤苦如曉齋夫婦者甫成立
卽死且死先其老母九原有知能無餘痛耶合葬
長沖金星山申山寅向兼坤艮墓已宿草而余不
獲一臨其穴今其嗣子景濂乞爲文以表撫今思
昔不禁余涕之縱橫嗚呼曉齋已矣茲誨爾子式
穀似之景濂其念哉

唐母甯夫人墓表

夫人姓甯氏湖南善化人配同里唐方伯仲寬世
所稱陶山先生也夫人卒於道光四年秋壽七十
有三與先生偕伉儷者五十六年子三人長鑑翰
林院檢討浙江道監察御史次鏌浙江鹽運司副
使三錢甘肅涇州知州方

今上卽位之初迪簡賢才海內欣欣望風采而陶山先
生出道員不一載躋擢至陝西布政使護理巡撫
長君鑑擢廣西平樂府知府父子承
恩皆以候補人員膺

特達之知爲向來所未有人以謂夫人之夫之子之賢
由夫人之德實有以致之也夫人性慈和克勤克
儉自少至老無稍替家人一切生產米鹽絹布以
及奴婢衣履下而至於雞犬飲啄之務皆躬之忘
其勞或勸以老且貴宜自適曰我自樂此不疲也
居恒惜物力甘淡泊衣粗茹苦至聞人有困乏則
不足其願不止其佐陶山先生也處相勗以敬出
相勗以廉入矩出繩子姓瞿瞿然率循不敢踰而
長君尤負時望有聞於道德蓋其教固然幼侍舅
姑以孝養著舅官山東之肥城夫人侍姑往未幾

姑沒遂葬肥城之陶山陶山者岱岳之支裔卽先生以之自號者也先生致仕僑寓金陵夫人病中猶約以歸湘而竟祔於肥城者所以終夫人侍姑之志也雖先生意猶夫人意也其葬以道光五年二月十八日山向以癸丁其生卒年月日及子孫婚嫁並宦族別具銘狀中不具述述其大者表之以敦彤史氏之教焉

節孝黃母陶太君墓表

今上卽位之初元有

詔各直省採舉節孝貞女孝子順孫用風示四海爲政
化先先是嘉慶二十四年夏余將之官川東與太
君族子翰林院編修德濂語及吾邑節孝多厄窮
孤苦往往阨於吏不得達因以太君節行及德濂
之祖母廖王氏與余家十四齡救父溺死資江之
孝子排七同請於禮部輾轉行查至是遂得奉

旨旌表如例余妻德芬爲太君女孫旣偕其諸弟建石
坊於門閭以榮

聖恩復樹碑墓道表太君之懿行禮也惟太君芝蕙之
質秉於生初松柏之操光於里黨積久彌灼侯其
禕而太君爲處士孝應公女幼有至性長適雲瞻
公諱時泰有子一人崇榜今已故女一人適百花
臺王懋載孫三人長德商次德尙肄業天文生已
故次德喬太學生曾孫三尙幼太君年二十九賦
寡鵠煢煢撫孤自成立余妻甫一歲而弟生以乏
乳故鞠於太君恩斯勤斯雖女孫猶女也太君性
慈良平時語若不能出諸口親疏罕見其面而禮
法秩然一發言必依於典則其母家與寒舍望衡

對字幼習見吾 曾祖母彭 祖母李兩太夫人
之教時舉以訓其家人所居洪崖坪當河曲之中
道吾 母黃太夫人歸寧母氏則必經太君之居
每迎門相慰勞甚洽余年十八入泮過而拜其門
太君目之喜遂以女孫女焉余時隨 先子讀書
遠出旋以計偕留京邸故余妻常居母家實惟太
君是依茲之建坊樹碑諸孫職奔走女孫德芬實
肩其成匪曰門楣是光庶幾仰識

聖天子旌揚之淑典永永無替卽藉以稍報劬勞於萬
一云爾太君生於乾隆三年正月初六日沒於嘉

慶十年十一月十四日壽六十有八葬於黃沙溪
之棗木崙西山卯向

袁太君墓表

太君姓江氏江津袁先生毓秀之配丁丑進士坦
之祖母也年二十歸於袁逮事王姑烝烝色養不
十年失所天茹貧矢志撫諸小姑及子咸有成享
壽八十有一而卒生平淳懿慈祥無疾言遽色或
值橫逆人所不能堪弗較也惟喜闚窮乏袁先生
精岐黃活人多急人之急傾其囊不足則輟轉稱
貸以給索負者常塞戶限諸弟婦咸嫻笑之而太
君無一語交謫且助之施歲歉家無三日儲聞鄰
有不舉火者卽以其米與之其樂任卹如此生三

子曰某某曰煥祖坦卽煥祖子庚午舉四川鄉試
出余門下太君猶及見之太君沒坦始北上應禮
部試一試而雋其入縣學舉鄉試皆一試而雋也
太君生某年沒某年葬某山坦以狀請表其墓爲
系以辭曰

絜膳肅醴虔筐筥也屏華務素劬機杼也德之容
容式有序也心之翼翼行無齟也芝蘭森庭駢玉
樹也焚黃有日受天祐也

處士夏明旦先生墓碣

公諱益後姓夏氏明旦其字世爲安化二都人少
勵於學屢試弗售遂韜迹以終性和厚與物無競
人皆稱爲長者家庭之間雍雍如也尤好獎掖後
生懇摯之懷見於顏色配黃孺人有孺仲賢妻風
舉丈夫子二長植敬次柏敬女一適黃公崇榜余
妻所自出也孫五人植敬出者三柏敬出者二孫
女四人植敬柏敬出各二婚嫁皆士姓公以乾隆
己未十一月十六日生以嘉慶庚申正月二十八
日沒葬某山之陽憶往者戊午之冬余妻始來歸

明年春以外孫增禮拜公於其居一見喜不自勝
曰郎君貴人也吾老矣恐不及見之盍豫爲挽辭
冀得日觀焉因屢言不已余異其曠觀而慮爲識
也且豫凶非禮弗之諾其後二年余列名賢書而
公竟以先數月歸道山繼成進士入翰林則距沒
時二年矣雞黍之約愴然於懷爰因哲嗣之請書
其梗概彰之墓道報相知之早也

上舍王虎文先生墓碣

先生諱崇焯姓王氏虎文其字同里百花臺人家
世素封爲里中衣冠舊族先生性安雅不設城府
順身豐頤舉止翼然鄉里重之喜詩書尊禮儒者
澍年十二隨先君子館於其家禮意甚厚澍時
甫學爲八比之文凡一月而成篇先生大驚喜齒
之異於諸子弟其後一年先君子以督修文塲
辭去嗣館益陽或間歲乃一晤然每聞先君子
歸則必遣其子來起居道契闊意久而益慤所居
墅曰紅泥田陵谷幽邃書館直其南中間以溪竹

木蓊然風起淅淅與水聲相應古檀數株矗起冒
山椒 先君子每與談止其下澍輒尾其後聆其
言論迄今歷歷如目前事先生生於雍正某年月
日沒於嘉慶戊辰月日配賀孺人有淑惠稱先生
之賢蓋得孺人而益彰焉子五人某某孫某某葬
以卒之月某日兆在某山嗣君輩以隧道之文請
會澍北上未果爲明年先生之猶子育成進士歸
乃書此以寄用識相知之誼云

劉水亭墓碣

戊辰春余過友人胡上舍京南於浮邱之麓並馬
同行遙望浮邱提隆肆萃有如鼓角其西麓磅礴
蜿蜒忽起忽落迤而南突而東忽轉而西向因顧
謂京南此間常有吉壤京南以輓指森鬱處曰是
故水亭劉君新阡也因爲余言君之爲人君諱某
字某水亭其號性慷慨好施予往往不顧家之有
無外舅郭翁有二女而無子生事卒葬一以身任
且語其子以久而勿忘居平見廢疾餓者必推解
之死無歸者必棺槨斂之族人之貧不能娶及因

貧而欲離其妻者必多方全之其於橋梁之傾壞
道路之險嶇修除者更難枚舉也世居於碧田其
族自明末居此戶口日繁君乃倡族人修宗祠置
祭田凡十餘年而始成復建議纂輯家乘未訖事
而沒實嘉慶七年之某月日距其生某年月日享
年蓋五十有一云君之葬以某年月日逮今四年
矣余惟卜宅兆以安厝其親人子之心皆然而吉
地則別有司之者昔李西涯先生之祖爲舟子渡
每不索值有異人指狐眠處葬之其後遂至三公
如劉君好行其德未知視李公何如若青島家言

可徵當必有論起者君之嗣君與京南有連京南
以余語語之是秋其家應試者果獲雋嗣君因請
余書之墓門焉

曾生墓碣

曾生學寬字敬敷漢紳上舍之長子也五歲入塾
語以古聖賢事輒奮發見者異之十三就外傳覃
精爲根柢之學自言讀書如遇生人會面數次自
能識之風雨寒燠無間斷爲文務速就每課三藝
不斜晷必訖橐乙亥院試已入彀矣而復遺無何
遂齋志沒嘉慶丁丑冬也年二十有六其生也以
乾隆壬子某月日余時未成童與漢紳同學於挹
秀軒今春漢紳不遠數千里視余於川東語次及
生已宿草四年矣俯仰之間不勝今昔之感因爲

綜次梗概以碣其墓且系之哀辭曰

伊與元之烏兮履迹子雲奚集座之鵬兮遽天賈
生悼芝蘭之易萎兮猶蔚其文幸兩雄之在鞠兮
庶紹清芬

側室張氏墓碣

側室張氏名小李字妣娟長洲城外楓橋人也本上海縣黃渡鎮人父張某與長洲張翁善張翁無子女乞張某女乳之時方襁褓也稍長張翁夫婦相繼沒復鞠於鄰母李氏年十五來予家因遂以小李名之明年冬卜吉納焉壬辰閏九月初九日子時生子枕時予方以巡防秋汎駐清江浦先是桃花汎過時予以巡閱營伍自清江浦蒞海州登雲臺山祈嗣於三元宮四月念六日返旆於安東而盧姬適生子報至名之曰佑元比秋而小李復

生桃遂以佑魁爲之幼名云姬侍余七載恪慎溫
淑克諧妯娉樂善好施宜永其年而竟不祿以道
光十七載八月某日病卒年二十有二遺孤熒熒
夫所依恃余年踰知命顧茲沖幼鞠育成立實賴
所生朝槿忽零桑榆奚託余夫婦之悽惻者非但
閨門之恒悼而已以本年十月自金陵送櫬歸里
卜葬某原他日桃長有知其余念之哉

楮先生傳 十四歲作

楮先生者名桑中州人也其先本穀姓生愛楮山之沃卽其地居因自別爲楮氏而世猶稱之穀桑云初楮生之生也其母夢神咒之曰穀田之潏泱纍予瓣之穰穰漬而刷而澤天其光經而緯而模地其方燁之乎而子之文章覺而生生比長能自樹立與剡人藤青蜀人薛骨及族子構交最密誓生死當是時天下言文章推縑與簡然二人者素貴重於人多不便桂陽蔡倫典尙方惡之乃造意拔取山林秀逸之士楮生與藤薛三人偕往至則

有麻某與衣零布曳破履者已先在矣生恥與共
事欲弗入倫驟起迎謂曰足下始自山出有朴茂
之根器願少安毋躁方將坐足下三浴而三薰之
旋館之於東門之池且曰江漢以濯秋陽以暴儒
者之道在是士不入範圍而能成其材者鮮矣願
更勉之生山人初至殊生梗聞倫言乃更自湔滌
挫剛爲柔久之藝成粹然出於衆倫大喜餉以芙
蓉之粉謂桑音惡更其名玉版見諸上上一望其
姿宇有雲輝月朗之概舒展自如而平正妥帖精
白無疵知爲載道器也命與諸文學游暇則課以

文集

井野人有事亦任託而不洩又不自祕有欲知其
隱者卽取懷而予以故當世咸德之其在文館與
陶泓陳元毛穎相友善出入未嘗不偕而於元尤
有固結不解之交蓋其學問雖由生質而資於良
友者亦多矣曩周穆天子之世有方策者能識文
武之政貪人脈望害其能穆天子怒曝脈望於羽
陵脈望驚走追而斃之其後策遂廢而生繼起脈
望餘蠹欲復九世之仇曰楮生繼策楮生卽策也
更攻生生病之而心力亦爲之瘁矣已而上召生
點其籍不復整頓上戲之曰萬字軍奚乃折其大

牟耶生以實對上雖惡脈望而亦不復用生也生遂歸名山以老其後子孫甚盛在洛陽者尤以太沖見貴云

贊曰余讀山海經見楮氏之族有居脫扈之山者陽帝之山者萊山者廆山之西翟谷者惟楮生出中州最稱烜赫嘗怪宋人刻意學楮氏三年僅得其枝葉而蔡敬仲一見卽決其根器朴茂爲之滿雪以遂其材此可爲文字之知己已自生遇知後楮氏之族徧天下一切日用瑣屑之務皆躬之世亦易視焉然楮氏本以文章進有體有用功在天

下余故列生之出處行事俾澤古之士有所考焉

楊先生傳

先生諱晉字建中安化一都小淹人也父允升淳厚端直鄉里稱善人生子三先生齒居長自幼穎敏好學受業吾家再從叔祖學海公公奇之以女妻焉稍長應童試輒有名歲甲辰督學姚雪門先生取入縣學第一名爲博士弟子員非其好也長齋繡佛日喃喃誦華嚴文字不置口蕭然物外雖至親罕見其面篤於孝友其至性肫摯有固結於中而不可解者初仲弟病劇其父憂之日夜垂涕泣先生慮傷父意私禱於神願易弟死神許之遂

投繯以殞鄰里族黨莫不駭痛詫其行而悼其志也殯將發有蝴蝶大如掌徘徊幄內集於木主揮之不去先鄉賢公時方襄葬事歸以語澍連稱建中之靈建中之靈云澍束髮學爲文猶未知名獨先生一見大喜曰我境得一佳翰林矣迄今談者謂有人倫鑒焉先生爲文初學學海公學海公性通脫敏於文手寫口授日可得十數藝先生稍加以矜慎迎而距之一以清真爲指歸然不自以爲得意往往隨手棄去故亦無傳藁人尤惜之論曰余讀金縢知周公嘗欲代武王矣精誠所至

風雷爲開雖然武王君也兄也納策俟命未聞自
戕也晉書載王獻之病術者言生人樂代則可生
徽之謂才位不如弟請以餘年代之術者曰君年
已無餘何代也未幾俱卒是知生死非可術代况
以兄代弟尤非理之所安雖然先生之志則以爲
父也弟愛於父弟死則父之意傷輾轉躊躇計無
復之而出於此耶亦可哀也已昔孔子稱甯武子
其愚不可及余於先生亦云

陶文毅公全集卷四十七目錄

文集 行述 哀辭

曾祖文衡府君 曾祖妣彭太夫人行述

例贈儒林郎翰林院編修顯考莫江府君行述

例贈安人顯妣黃安人行述

亡弟子晉哀辭

文集

行述

哀辭

曾祖文衡府君 曾祖妣彭太夫人行述

先曾大父府君諱崇雅氏陶文衡其字也世居安
化一都之小淹陶家溪自祖以上皆忠厚長者世
多隱德 祖伯含公有幹略手置十餘莊尤好則
人之急如已之急途行遇瓦礫必檢置空處鄰里
競爭者經其調停無不保全以是人咸德之時鼎
革之初良莠雜出鄉人縛竊匪方溺之適 公過
賊哀呼曰惟公能救我我無復敢爲盜 公爲請
釋於衆而施渡舟小淹使守以安其生終 公之

世凡施舟八而其人卒改行爲善族子有騎而徑
過其門者追之入而切責之曰宗廟必下路車必
式古之制也祖宗邱墓之鄉曷敢不敬况干戈甫
息奈何貌追兵以駭鄉鄰一事而犯三不韙哉邑
令聞之以爲鄉三老好讀書建館延師禮意殷摯
束修外月必有所餽遺長子千仞公諱志翔文學
生次 翎先公諱志鳳社學生次翎彩公 翎先
公卽 府君之父也 翎先公席 伯含公業頗
饒裕居恒自尊重每往棚舍孫四五輩騎馬尾之
平生怒人不出惡聲有大逆意者但曰這種這種

者言乃有此等人也奴僕十餘人待之皆有恩每歲除自與子孫飲堂上諸僕飲堂下酒酣自起爲諸僕酌曰辛苦爾等一歲飲此以達老人意其盛德如此初伯含公好周貧乏族中流落者收養之恩禮一如家人有至公之世而返顏者伺家人出則擊之而公以上多兄弟乏嗣單傳凡三世公之配彭孺人長齋祈嗣爰生子五人而府君齒居三府君生而沈毅寡言笑每出必有以自衛當是時外侮猶甚獨無敢撓府君者性勤能無紛華習種植外時或市茶漢鎮旅邸無

事輒結網以習勞人莫知其爲商來也嘗有雪夜入米室盜米者府君跡之得其居乃所素識寂然而返終不言其人後府君沒三十餘年曾大母彭太夫人偶舉以訓孫子家人始知其事蓋猶隱其姓名云彭太夫人者本都白沙溪茶亭居士志道公女也年十六來歸文衡府君府君未五十卒一切家政皆太夫人經紀之門庭肅飭男婦數十口事皆稟命行人謂巾幗中丈夫也開書館延明經黃先生明棟命子姪從遊款接豐隆每時物出必先奉先生炊餉諸同學然後家人

乃得食如是者八九年無倦意喜留賓有截髮風
猶子如元龍燦昭輩才而貧且好交友客至必邀
至太夫人家以其禮意勤而豐約適宜也晚年
子姓蕃衍福履醇和享壽至八十有七而卒子六
人澍之祖寅亮公其次也孫十九人曾孫三十
六人元孫二十二人皆詳譜牒太夫人沒年家
人爲延工畫像每朔望展拜如生存後以文衡
府君像獨缺乃更繪木主於像左而列六子其下
以遂瞻依之意不孝生也晚於先世行誼不能盡
悉而先世又多隱行其善欲言之而無從也爰卽

夙所聞於大人者書之家乘俾後之雲祲有所

想像焉曾孫翰林院庶吉士

謝

謹述嘉慶癸亥冬

例贈儒林郎翰林院編修顯考黃江府君行述

於虞天胡不弔喪我府君之速耶府君捐館

之數夕不孝澍忽夢府君至京嗣復夢如殯斂

狀曰猶炯炯然不覺失聲慟哭奴輩呼醒心悸甚

然竊意府君春秋方富不孝等罪孽雖深豈遽

有此檢占夢書觀之乃謂夢死者兆吉於虞夢耶

非耶孰知抱恨終天竟至是耶不孝生未能盡孝

養沒不獲視含飯何容復生人世惟府君有志

未伸本末具在倘致泯沒罪愈重大用是忍延殘

喘濡血和墨敘次所知冀當代立言之君子垂采

焉 府君姓陶氏諱必銓字士升家茱萸江濱故

號萸江先世出晉大司馬桓公往返遷徙吳楚間

後唐同光元年有諱昇者復由吉州遷楚之安化

族甚蕃十一傳至 鄉賢公諱耀祖字伯含益恢

先緒數救人於死又造舟通津以濟行人兩平皆

列庠序 高祖翎先公諱志鳳其次也 先曾祖

諱崇雅字文衡有隱德 先祖諱孝信字寅亮例

貤贈儒林郎翰林院編修爲人樂善敦古誼嘗見遺金

竟日俟其人還之叔祖學海公病偏廢日飼以口

幫脣皆自爲漚洗逮沒乃已其懿行甚多鄉里至

今稱道 高祖妣氏彭 曾祖妣氏彭 祖妣氏

李例

馳贈太安人 先祖生子四 府君於次爲季生時

李太安人夢吞桃實幼穎異聞 先祖談古史及

星象輒向家人述之無遺六歲從堂叔學海公受

經笈及子史多所究覽下筆驚其座人學海公奇

之曰吾家神駒也時堂伯洞崖先生必麟堂兄蘭

江先生禮咸以英年積學有聲號爲三陶丁酉正

月院試與蘭江同補博士弟子員學使爲侍講學

士仁和李寶幢先生汪度先世自 曾太母彭太

安人嫠居課子厚禮延師每以詩書廢墜爲憂及

府君叔姪並雋 先祖喜謂後起有人旋命

府君纂輯家乘稟成以歲歉未及刊戊戌三月六

叔祖性安公遷居鄖陽 先祖爲擇日時及期往

送忽墮地作鼾聲至所擇之時而卒 府君哀毀

骨立居憂一遵古禮是冬 不孝 生 府君撫而

泣慟 先祖之未及見也已亥守制家居饑饉後

道有死者 府君倡義募錢數陌數十爲斂葬費

掩坎之役乃至身親爲之庚子服闋教授里中愈

肆力於儒先傳注手握丹黃夜以繼日辛丑 不孝

潛

生于寅復館里中近村有虎患白晝噬人於途

府君率里人爲文牒境內之神其言激昂沈痛

比於昌黎之驅鱷魚七日而虎去不復見人以爲

至誠所感時請業者衆皆樂得府君教育而

府君方勵志問學不欲羈處井開明年詣城南書

院從太史余存吾先生游先生每稱爲今之正希

繼而當事者改隸嶽麓書院閉戶醺精所詣愈邃

掌教少鴻臚羅慎齋先生極愛重之秋闈薦而不

售乃歸乙巳束書復往已登舟矣會風阻反見

李太安人淚潄潄也大慟曰讀書自在吾豈宜遠

涉貽母憂耶遂止歲試補廩膳生學使爲通政司

副使昆明錢南園先生澧先生高風亮節以主持

風氣爲已任歎賞特甚屢試皆高等擇其文尤古

者梓之是歲館邑之十二都王氏

不孝澍

始讀書

丁未家居時連歲歉收而食指日繁兩伯父竭力

經營且不支遂析箸於是益貧乏或數日斷炊

先妣黃安人攜

不孝等

躬采藜藿以佐食詰屈之

狀人所不堪而

府君誦歌不輟也已酉館上舍

王虎文先生家

不孝澍

始學爲八股之文其冬攜

應縣試庚戌邑人謀更修學校邀

府君計事先

是邑有塋在縣南筆架山科目稱盛後移城北遂
不競書院亦歲久頽落府君乃次第經畫甫定議
而先妣黃安人病祖妣李太安人念之亦病
數日卒時十一月十五日也府君號慟幾絕越
一日黃安人又卒府君率不孝等哭靈前弔客
不忍聞見葬事畢兩學師及邑人謂建塋之議始
府君精幹可倚仗且信且起辭弗獲明年既卒
哭乃強任之時以明倫堂旁廨爲辦公所晝則部
署公務黃昏後一燈熒然督不孝等誦讀工匠既
集而公用不繼拮据甚乃徒步集費日數十里往

來風雨弊礪中至於咯血不少休鄉人感其義相
與捐貲逮冬而埵成矣於是以餘金葺書院復訪
求城樓舊址會益陽曾氏堅請教授乃止然其後
卒改修遵 府君始議云壬子攜 不孝澍 往館曾

氏主人筠齋先生故宿學 府君暇日與論據古

今出入羣史甚相得也是歲洞崖公入縣學歸至

益陽江口遇堂伯添眷公自鄖陽奉六叔祖旅櫬

至以書抵 府君 府君得書賦詩曰數載關心

切今朝慰眼初兩帆歸路緊千里汨舟徐骨肉精

神合存亡涕淚餘柴門應鵲噪書到獨躊躇蓋一

府君天性肫摯以叔父客死朝夕縈念經營數歲
乃得歸柩故喜極而悲不自知其流露也甲寅

府君年四十猶館曾氏冬改葬 李太安人初

太安人與 先妣黃安人俱葬石頭原歲有水患

至是改 祖塋之饗堂祔 先祖父墓而葬 黃

安人於南竹山乙卯 不孝澍 入縣學丙辰攜 不孝

澍 讀書水月庵庵俯石門潭距居宅三里許兩岸

石壁插江如門水綠淨竊然而深漁歌桡曲有濠

梁閒意 府君每欲於其上建閣以居云丁巳復

館益陽戊午己未館石井劉氏嘗與主人靜園先

生及諸門人登浮邱山飲酒賦詩爲樂其地有宅
居者輒病崇易其主數矣聞 府君驅虎事乞爲

文祭之竟無患初

不孝潛

以年幼讀書里塾後廢

學且三年

府君以爲尙可成就是歲遂攜以自

隨庚申

不孝澍

鄉試中式

府君偕至長沙謁本

房李香畬先生乃知

府君卷同出其門兩主試

皆加激賞而竟遺於額數歎惜不置辛酉正月二

日命

不孝澍

北上臨發諭以此行得雋固所望否

亦必留京爲進取計春闈報罷遂止京邸明年壬

戌會試中式

殿試名在二甲前引

見改庶吉士

府君得報焚香告於

祖先馳書諭

不

孝

言玉署清華士人榮遇務益砥礪以仰荅

天恩六月偶染暑溼臍以下皆腫膚破水出諸醫束手

忽一丐踵門自言能治出藥草一束服之卽夜泄

瀉而腫消其半次早留藥辭去止之不可予以米

錢弗受笑曰後日來索謝也竟不至而疾起矣憶

向者倉皇中丐來固未嘗飲食之其夕亦不計棲

身何所遠近咸以爲神秋杪

不孝

請假南歸十

一月舟至岳州遇舊僕始知

府君病狀又聞愈

後往長沙一月矣促長年驟進相見悲喜交集除夕乃抵家癸亥蘭江先生輯家譜稟成請 府君

討定之 府君以 先祖有志未逮樂其成日夜

秉筆迄冬而蒞事十月癸亥命 不孝澍 修築 先

安人塋地復修 先祖父母墓工竣命 不孝澍 人

京 不孝 未忍遽違膝下 府君促之再三日汝仰

蒙

皇上錄用此身非可家食况庶常清暇正宜厚植根柢

爲異日有體有用之才吾不能效俗情作兒女姑

息愛也 不孝 泣諾甲子二月遂起假赴都 府君

送至江岸

不孝

拜別登舟相望流涕於虔孰知此

刻卽成畢生永訣耶

不孝

自七歲隨

府君受書

朝夕在側癸亥家居猶獲親依警歎乃懵然以爲

常不知及時侍奉由今回憶求其片刻承歡瞻望

顏色豈可得哉豈可得哉

不孝

三月自長沙起

行四月杪抵京五月初九爲

府君五十之辰同

人將製序爲壽

不孝

請以詩代求歌詠其所志

裝潢寄歸是時

府君猶銳意觀光七月買舟至

長沙以感疾手顫乃止九月愈寄示

不孝

述懷

數首有秋容彌菊圃春氣在蘭芽之句冬歸治文

昌閭既邑令牛君暨邑人議修縣志請 府君主

編纂事始 府君修塏時慨邑志百餘年無續者

文獻無徵又前志舛雜欲更纂輯每因集費往各

鄉輒訪問其人物綜覽其形勝古蹟殘碑摩挲殆

徧有所聞見隨手劄記久而成帙今年五月札示

不孝

言編次將告就於舊志補闕訂譌續入者

必精必核書成當可無憾命 不孝

於京師乞名

人序跋詎意甫脫橐而六月以寒暑失調氣滯微

腫遂歸家至閏六月初九遽棄 不孝等

而逝也於

虔慟哉 不孝

方應府試聞疾踰踰奔歸

不孝

以四月十七日散館書久未達病中數垂問易簣

前二日報至始知

不孝

獲授編修職

府君感激

聖恩若不自勝以手拍牀有聲曰吾願遂矣傳語兒輩

厚自樹立及病亟家人環泣請遺命無一語及家

事微開目視曰此心光明復何言惟縣志未刊樹

歸爲我成之於虜

不孝等

不肖無知將何以竟

府君之緒哉

府君爲人清貌頤身眉目疎朗髮

長至地性磊落負氣節遇事有定識利害不能奪

與人交無城府一行之善一字之長卽自若不及

津津乎有味言之惟不能面諛人有過失或痛加

折斥豪勢不稍假然事後卽不復記憶人知其無
他弗憾也善飲酒酣後縱談慷慨聲動鄰屋少時
嘗拾薪摘茗芽市米以就學在嶽麓城南時蔬菜
日不過十錢書院故有大吏月課列前者例予金
爲勸賞 府君賴此佐膏火貲讀書至夜分日麻
茶則毅然自持繞案走至旦其後竟不復思睡嘗
言冬夜溫經火盡寒氣自足趾入徐自脛至膝至
股髀至腹乃不復可耐然後寢晨起就火猶漠然
也飯後始能暖其刻苦如此務貫通不爲章句學
每開卷縱橫盈几案批卻多前人所未發熟於掌

故窮源竟委指數如掌上紋年月甲子無一舛漏
尤喜按節義事爲文傳之自言他日有可存者吾
古文也爲制義幽香沈刻力追先輩然文愈高遇
盆澀處矮屋六十餘晝夜檐風晷景辛苦備嘗雖
屢薦未售終不少貶以求合詩宗杜韓各家原本
性情而不盤於法所著有易經抉微書經抉微春
秋滙覽批點杜少陵集批點韓昌黎集分韻新編
黃江古文存黃江詩存黃江制義安化縣志待刊
平生不營財產視阿堵物猶土苴也偶有贏餘專
置古籍插架甚富皆印愛吾廬藏本於卷首愛吾

廬者 府君書室嘗書杜兼清俸買來手自校子
孫讀之知聖教嚮及借人爲不孝語示 不孝等曰

吾書雖非俸買然舌耕所餘得之尤艱宜珍惜以
貽子孫於庠手澤具存 不孝等其敢忘傳經之苦

心耶 府君教人不拘一格談經課藝終日無倦
容於天文律呂禮制開方諸法尤覩縷詳明或離
席畫地作圖或於中堂揖讓進退以演之其立課
倣先儒之分年日程而以通經爲本嘗謂經熟則
義理熟而言之有物以故及門之士咸知趨向實
學取青紫者甚多 不孝謝自幼跬步弗離 府君

每語以古賢可敬可畏之事以感發其志氣雖途
間食頃諄諄然隨事指點夜則蹴以足而詰日間
所學詩古文辭旁及俚詭之文皆聽以意爲之未
嘗限以繩尺惟媮情必戒夏楚不少貸

不孝潛年

十八始隨 府君讀書 府君憐其時過勤苦教

誘尤極懇懇焉居平爲義若嗜欲有友死債累累

府君念其子穉爲稱貸代償之親戚窘乏者必

竭力拯援處宗族藹然雍遜於祠墓尤致敬綜理

咸有法度見不法必極言誘導往往感悔爲善士

長伯早卒與伯父羨周公羨昌公友于無間嘗推

其器用居宇以讓日吾讀書兩兄力也姑母適李氏者早寡待之敬愛有加棄世時兩伯父慟欲絕鄰里族黨莫不傷悼多有涕泣者於虘慟哉 府君生於乾隆二十年乙亥五月初九日亥時卒於嘉慶十年乙丑閏六月初九日亥時享年五十有一配 先妣黃安人例贈安人賢德懋著先 府君十五年卒 府君言之每哽咽繼同里張氏子不孝兄弟二人皆 黃安人出長 不孝 嘉慶庚申

恩科舉人壬戌科進士由庶吉士授翰林院編修充功

臣館協修娶黃氏次不孝潛娶李氏女一黃安

人出適邑庠生同里周宗先之子光炯孫女二人

皆不孝澍出尙幼於庠府君生平志在古人行

在鄉黨悉卓然可傳不孝等苦塊昏迷語無論次

尙望大人先生錫之銘誄增光泉壤則不孝等生

生世世感且不朽不孝等世世子孫亦感且不朽

不孝澍潛泣血謹述嘉慶乙丑冬

例贈安人顯妣黃安人行述

於瘁 安人之棄

不孝謝等

而逝也於今十有三

年矣追維罔極之恩萬死莫報而於 安人生平

行實猶缺然弗傳懼久而遺漏則

不孝等

罪更難

逭用敢吮血和墨書之家乘

安人姓黃氏

諱

翠

蘭同邑河曲處士會朋公長女也生於乾隆二十

二年丁丑六月十一日辰時以丙申臘月來歸

家大人踰月而

大人泮遊其二年戊戌生

不孝

謝

又三年辛丑生

不孝潛

又三年甲辰

大人食

餽爲廩膳生又二年丙午妹氏三英生其後姪而

不育者再家計窘迫隻手經營遂病自生妹氏後
凡四年而安人卒庚戌十一月十七日申時也
初祖母李太安人居嘗稱黃氏媳能事我乃善
體我意庚戌秋安人疾作兩月弗瘳祖母念
之遂亦病是月望日竟卒安人聞哀以兩手反
支牀欲起視喪而不能家人亦力止之嗚咽泣不
已逾日而氣息盡矣時謝以取饌外出不獲聞一
言返惟見口喃喃若有所囑而已潛年十歲妹纔
四歲妹猶不辨母之爲死也見諸兄泣亦隨之泣
於悽慟哉姑慈婦孝生死相從之誼如是哉安

人爲人豐體而健力不類嗇壽者耐勤苦無肯一日閒其莊嚴孝敬則性成也幼侍母疾常不解帶事舅姑能得其心癸卯甲辰數年間大人在岳麓城南書院祖母老時復動少子憐安人所仰慰於其際者尤多人所難能其初來歸也甫半月值院試大人方艱於貲安人卽脫簪珥復檢家藏稻種數斗自舂之以資其行明正而報捷者至矣居平茹苦若薺歲饑采藜藿以佐食或數日釜炊無顆粒未嘗形諸口大人性不耐家事每歲客異地安人以所旨蓄儲之餅俟其歸

而食之以故 安人在日家雖貧 大人亦自忘

其貧之至是也 大人既淵心力學歲科試必拔

螭弧先登而棘闈屢薦皆不售不無悵悵 安人

以 李太安人在堂不宜使老人知益其悽惋惟

勗以勵志無懈故 大人雖不得志有司而文壇

執耳之稱遠近無異辭則內助之功爲多矣撫 不

孝兄弟 寒暑維謹 不孝潛 幼穉家居 安人出入

必以自隨妹氏尙乳則以幅布裹之負臂間而躬

親操作於庖自來十五年辛苦備嘗而 不孝等 竟

不能爲執一日勞此恨何時已哉 不孝澍 自束髮

隨 大人遠館 安人每泣送之諭以毋嬉毋怠

冬歸聞讀書多則色澤甚嘗以小疾未赴館終日

持卷據火默誦之 安人喜曰兒勤讀如此可不

枉爾母苦矣棄世之年謝齒十二初應童試 安

人盼望甚殷自祈籤大士前祝者言籤吉必售

安人輒喜以語諸妯娒病亟聞縣試呼謝至語以

病且瘳毋慮宜速就道其後五年謝始以院試第

一二爲弟子員又五年始列賢書又二年成進士爲

庶常而 安人皆不及見矣不孝語 白 安人卒

後始讀書今尙覲顏童子軍中未知果能有成不

一致辜顧復之恩否也傷哉 安人初葬石頭邱與

李太安人同兆有水患甲寅冬乃改窆 祖塋

之南竹山而修理猶未善茲 不孝澍 於壬戌九月

自翰林院請假修墓松楸在望瞻仰依然求如生

前之朝夕承顏此生不可復得矣於悊慟哉 不孝

澍 泣血謹述嘉慶癸亥正月十日

亡弟子晉哀詞

嘉慶癸酉七月二十八日晨起得家書良久不敢
發視蓋余弟之病久矣獻歲以來寂無音耗先日
爲弟誕辰內子輩言及猶以爲詫余爲吟轉畏消
息來寸心復何有之句孰意書至而弟果棄余而
去也哀哉弟之沒以壬申七月十五日至是一年
矣家人慮余悲遲遲始達書凡余心目中搖搖以
冀其痊可者乃忽如甌之墮於地也天乎其厄余
亦至是乎弟諱潛姓陶氏字子晉號石潭以乾隆
辛丑七月二十五日未時生

敕祀鄉賢祠贈儒林郎翰林院編修黃江府君第二子

也於同堂齒居五因以五稱云幼值家落歲且歉

府君攜余館於外留弟就村塾肄業一載輒廢

嘗隨 先母黃安人持筐采藜藿以食行坐靡不

偕周氏妹尚乳則襁負之 安人每戲謂曰爾與

妹吾子也阿兄爾父之子也於虐語雖諧其尤可

哀也已未幾 安人棄世 府君方綜理安化學

官事旋館益陽饔飧給於人勢不能以兩子往故

弟遂廢學與諸從兄之業耕者伍長鑣短鍤朝出

暮歸 府君心竊憐之而猶幸其無牽衣戀戀之

態得以稍釋於懷每歲終解館歸父子兄弟暫聚
若搏沙而已歲戊午弟年十八忽感微發憤欲讀
書自春徂秋畢易書詩三經咿唔窮日夜不自休
或府君爲他生講解乃輟讀傾聽爲領首狀詰
之則耳獲者已兼數人之業矣隨執筆爲文兩月
卽成篇斧藻經語滔滔汨汨不假繩削而合府
君大驚喜曰家有名士而不知吾過矣逮余鄉舉
入都府君猶館益陽弟依依隨侍業日益進猶
憶壬戌余自翰林假歸一日府君圍爐斟酌余
與弟侍側府君熟視弟久之曰是固佳兒惜未

能修飾之耳於虜罔極之恩其所以望弟者不綦遠哉 府君之捐館也弟方應院試先夕聞訃匍匐歸及服闋府試期近或曰縣案猶可續弟怫然斥之或以語余令弟何太驢余笑而謝焉戊辰弟赴試不售其秋余挈眷北上弟送至長沙揮淚而別余爲賦詩數章明年入縣學爲弟子員余寄詩曰能持門戶應憐爾畢竟詩書不誤人蓋深幸弟之能自成立也庚午秋余奉

命典蜀試歸道三峽弟徒步數百里候余於荊州作竟夕談次早復徒步別去潸潸然淚落不止於虜半

生手足自此不復見矣慟哉弟爲人質直寡言肫
誠無僞有所可否雖責育不能遏人畏其懃久而
樂與之親也粗衣糲食紛華無所悅顧獨好酒每
飲盡數十斗余初不知也覩其貌黎然若中有甚
戚者旁詢始覺屢戒之不能悛卒以此死病中作
書備述其悔且囑余愛身有爲以報 先人其於
家庭骨肉之際委曲周詳無微不入又爲詩曰誰
無兄與弟兩地共一心知詩書不予誤會面待異時
余讀而惻其音之悲爲之流涕殆所謂豫識歟弟
沒時年三十有二葬於 祖塋之古壠塋娶長樂

李氏少於弟五歲生二女長許字同里庠生黃德
沉之子力釗次許字同邑蔣澤潤皆幼續舉孿子
二人不育卒未復舉一子曰親賢所以永吾弟者
賴有此矣自余 母余 父前後棄養余戊辰來
京僅五載耳期功之喪頻聞同胞一寡妹亦死弟
孿生子與余子椿復死今而吾弟又死親丁十二
口爲男子者余與親賢耳顧影徘徊進退維谷九
原有知弟之慟當不減於余也聞耗後淒涼相弔
泣思吾弟生平已矣何忍聽其泯沒聊次其崖略
如此冀發微闡幽之君子矜而錫之銘誄爲吾弟

華袞榮且先之以辭以自鳴其哀曰

伊余弟之秉貞兮氣沈沈而壯烈羌知雄而守雌
兮蘊精明於訥拙歎時俗之寡知兮論心交於古
哲篤友于而念天顯兮荷析薪以爲悅奚好修之
不償兮遂促命於鬼伯回如愚以復禮兮年四八
而短折嗟爾生之不辰兮迺立命於磨蝎矜一顧
以甫青兮頭未霜而先白兒呱呱其在襁兮弱妻
泣於幽闔噫余弟之臨去兮呼阿兄而永訣余身
在外而靡聞兮通精神於魂魄杜子哀而賦鵲兮
莊生夢而化蝶悵風雨之誰同兮倏煙雲之變滅

塊余情其獨難兮腸九迴而欲裂歎所際之多屯
兮由余生之驚劣奚貽患於余弟兮致蒼天之降
割秋空沈其迢迢兮秋風吹而獵獵望鴻鴈之南
翔兮綴遙行於天末獨失羣之孤鳥兮叫寒沙而
嘯明月弟之事猶未終兮匪余責而誰責瘖余馬
以言旋兮將省弟於窳窳慨會面之無期兮徒臨
風而嗚咽苟兄弟之因未了兮誓他生之再結